



KEMENTERIAN PEMBANGUNAN WANITA,  
KELUARGA DAN MASYARAKAT

## KENYATAAN MEDIA

### **WARGA EMAS DISARAN MENDAFTARKAN DIRI UNTUK TERIMA SUNTIKAN VAKSIN, HINDAR DARI COVID-19**

Hari ini saya telah membuat tinjauan dan turut memantau pemberian vaksin kepada seramai **162 orang penghuni warga emas** yang mendapat penjagaan dan perlindungan di Rumah Seri Kenangan Cheng, Melaka. Sehingga kini, seramai **652 orang penghuni warga emas** di institusi di bawah Jabatan Kebajikan Masyarakat (JKM) telah mendapat suntikan dos pertama vaksin.

Sebagai Menteri Pembangunan Wanita, Keluarga dan Masyarakat yang bertanggungjawab ke atas kebajikan dan kesejahteraan warga emas di negara ini, saya menyambut baik akan keprihatinan dan inisiatif yang telah diambil oleh Jawatankuasa Khas Jaminan Akses Bekalan Vaksin COVID-19 (JKJAV) yang mengutamakan pemberian vaksin kepada warga emas berusia 60 tahun ke atas melalui **Program Imunisasi COVID-19 Kebangsaan (PICK)**.

**PICK Fasa Kedua** yang telah bermula pada **19 April 2021** memberi tumpuan khusus untuk pemberian vaksin kepada warga emas dan OKU dan seterusnya memperuntukkan keutamaan sebanyak **1.24 juta dos suntikan Vaksin Astrazeneca** kepada warga emas yang boleh didapati melalui pendaftaran di laman sesawang **Jawatankuasa Khas Jaminan Akses Bekalan Vaksin (JKJAV)** bermula pada **23 Mei 2021**.

Sehingga **24 Mei 2021**, seramai **1.86 juta** warga emas telah membuat pendaftaran bagi mendapatkan suntikan vaksin melalui aplikasi MySejahtera dan daripada jumlah tersebut seramai **48,564** adalah warga emas yang berdaftar dengan JKJAV.

Sejajar dengan PICK Fasa Kedua yang memberi tumpuan kepada warga emas, saya menyeru agar semua warga emas untuk mendaftar dan hadir untuk mendapatkan vaksinasi demi memastikan kesejahteraan, keselamatan dan kesihatan warga emas terjamin serta terhindar dari jangkitan virus COVID-19.

Pada masa yang sama juga, saya telah meminta Pegawai Jabatan Kebajikan Masyarakat yang diberikuasa untuk mengadakan libat urus bersama-sama pusat-pusat jagaan warga emas berkaitan usaha mengaktifkan Jawatankuasa Pusat Aktiviti Warga Emas (PAWE) untuk mempromosikan pendaftaran penerimaan vaksin di kalangan warga emas dalam komuniti. Selain itu, beberapa pertubuhan warga emas peringkat kebangsaan dan Ahli Majlis Penasihat dan Perundingan Warga Emas Negara turut digembleng dan diberi peranan bagi membantu advokasi vaksinasi di kalangan warga emas di seluruh negara.

Kementerian Pembangunan Wanita, Keluarga dan Masyarakat (KPWKM) juga akan terus berkolaborasi dengan Kementerian Kesihatan Malaysia, Kementerian Sains, Teknologi dan Inovasi dan Jawatankuasa Khas Jaminan Akses Bekalan Vaksin (JKJAV) berpegangkan konsep *whole of government* dalam usaha untuk menggalakkan pengambilan suntikan vaksin COVID-19 di kalangan kumpulan sasar Kementerian khususnya warga emas.

Selain itu, konsep *whole of society* perlu dilaksanakan oleh ahli keluarga, jiran tetangga, ahli komuniti, NGO-NGO dan semua pihak di luar sana untuk memainkan peranan dalam memastikan masyarakat mendapat maklumat yang sahih dan tepat berkaitan PICK dan kebaikan vaksin serta menyampaikannya kepada mereka yang berisiko tinggi khususnya warga emas. Peranan lebih agresif perlu dimainkan oleh semua pihak untuk menggalakkan pendaftaran penerimaan vaksin melalui saluran-saluran yang disediakan seperti berikut:

- i. Aplikasi MySejahtera (ahli keluarga lain turut boleh mendaftarkan warga emas melalui MySejahtera);
- ii. Panggilan telefon ke Talian Program Vaksinasi COVID-19 Kebangsaan 1-800-888-828;
- iii. Laman sesawang Jawatan Kuasa Khas Jaminan Akses Bekalan Vaksin COVID-19 (JKJAV) di pautan <http://www.VaksinCovid.gov.my>; atau
- iv. Pendaftaran di klinik/hospital kerajaan.

Selain itu, untuk maklumat dan bantuan lanjut sila hubungi Talian Kasih 15999 dan talian WhatsApp 019-2615999 yang beroperasi 24 jam sehari.

**Lindung Diri, Lindung Semua.**

**YB Datuk Seri Rina Mohd Harun  
Menteri Pembangunan Wanita, Keluarga dan Masyarakat.  
25 Mei 2021**